

桑

志

桑志序

海鹽李聿求五峯甫簋

志桑一之始二之類三之事四之具五所宜六所植七
取材八祥異九品題十叢話余家滄海東沃野千里皆
桑麻是編比之贊寧筍譜陳翥桐譜之屬亦學圃之美
譚老農之清課也不賢識小古人所稱或者謂爲可補
王政之一端則吾豈敢

桑志

海鹽縣學生員

臣

李聿求恭錄

卷首

聖祖仁皇帝

御製農桑論嘗觀王政之本在乎農桑虞舜之命棄曰汝
后稷播時百穀禹之告舜也曰政在養民水火金木
土穀惟修殷之考績羣辟亦曰稼穡匪懈周以農事
開基至成王之世制禮作樂典章明備彬彬郁郁然
周公所作矇史所歌若豳風七月之篇其道于耜耨
趾采桑載績之事反覆不置何前後聖同一指歟蓋

農者所以食也桑者所以衣也農事傷則飢之原女
紅廢則寒之原小民飢寒迫于身而欲其稱仁慕義
有無不競遵路會極其勢不能朕嘗躬行三推以率
天下農矣而敦實崇儉之令繩督有司靡不加意宜
乎薄海以內襁褓之衆比肩于野杼柚之聲相聞于
里庶幾古初醇朴之風乃逐末者未盡息而錦繡纂
組之文日盛也中夜求治怒焉慮之孟子曰菽粟如
水火而民焉有不仁旨哉斯言使天下之民咸知貴
五穀尊布帛服勤戒奢力田孝悌而又德以道之教
以匡之禮以一之樂以和之將比戶可封而躋斯世

聖祖仁皇帝

于仁壽之域故曰農桑王政之本也

御製桑賦朕巡省浙西桑林被野天下絲縷之供皆在東南而蠶桑之盛惟此一區近在宮中刻爲耕織圖每示司牧使知其艱苦今更爲賦以託意焉伊彼條桑其葉始萐春日載陽綠陰乃披紫陌上兮嫋嫋綺岸側兮垂垂來璧旭之晨照受光風之午吹影映帶兮青翰色彷彿兮翠旗旣扶疎而相亞復低昂而參差念蠶事之欲動正芳候之如期聿茲女紅生計是賴采采盈筐慎加覆蓋虞日煦之少潤防雨頻之爲害

儻薄蘆之不繼時憂心之施施虔飼食之維勤勞形
神于塵埽摘曉露之輕滋乘良月之新蒼望千畝之
間間實蠶家之宏賚誠黼黻之必資繫袞職之用大
其重等于苗稼爲王政之不外予恒恐其難知作深
宮之圖繪至夫厥貢著于尙書沃若詠于篇什公室
見說于禮經牆下屢申于孟集試古訓之歷稽又民
務之應急若乃訝爲神木騁以青華末照是晞甘樾
如瓜馴雉表異黃鳥稱嘉雖景物之堪娛咸無闕于
大家夫其詫幢幢之高蓋美亭亭之奇樹靈根依倚
于十洲巨跡遂闢于周宇類齊諧之荒唐皆予今日

之所不取也聊因清晏簡牘是書用示遠邇是溉是鋤其知愛護種繞其廬蠶桑農穡安寶璠璣

聖祖仁皇帝

御製桑林乍綠蠶事方興詩以嘉之彌望桑林吐葉垂枝嫩碧初勻竹舍正殷蠶務天工雨露維均

聖祖仁皇帝

御製岸側桑葉初碧詩夾岸青青遶御舟濃桑初茁滿村謳省方遍問蠶家苦春雨連綿盡日憂

聖祖仁皇帝

御製采桑詩桑田雨足葉蕃滋恰是春蠶大起時負筐攜

桑志卷首
三
筐紛笑語戴鷺飛上最高枝

世宗憲皇帝

御製采桑詩清和天氣佳比戶采桑急濃濃零露繁冉冉
綠陰濕高柯學猱升落堪教兒拾昨摘滿籠歸姑猶
嗔不給

高宗純皇帝

御製條桑賦伊春陽之晚晚兮布始和于春風百昌欣其
向榮兮女夷協氣乎昭融柳冉冉其含綠兮桃天天
其暈紅尋綺陌而云邁兮採條桑其始豐則有長腰
健婦黃髮奚兒攜彼筠籠兮遵微行而纍纍持此斧

斯兮步遙術其遲遲蔚荃龍而豐茂兮邈洪榮而歲
蕤挺脩綠其端直兮上扶疎而參差韻條風之無聲
兮葉芳青而紛披浥朝露以流潤兮枝遠揚而下垂
于是旣采旣摛載筐載籃畱長條之猗猗取綠葉之
纖纖午靜茅檐兮列分行之圓遶春長葭屋兮餵八
蠶之新蠶故曰農莫苦兮農功女莫勞兮女紅慙歲
以月自春徂冬彼膏粱而錦繡者宜思憂樂之異同

高宗純皇帝

御製

聖祖仁皇帝采桑原韻牆畔青條著雨滋繁陰初覆葉齊時

春深入重簾爭餵稚子攜筐上綠枝

桑志

桑志卷第一

海鹽李聿求五舉甫箋

桑之始

桑之利民與菽粟等神聖所制夫婦與知上古
典籍不傳逸史間有道及者悉爲采集兼詳字
義志桑之始第一

京房易傳桑有衣食人之功

荀爽易注桑者上元下黃以象乾坤也

虞翻易注與爲桑

毛亨詩傳桑木之衆也

孔穎達禮正義桑衆木之本

說文桑蠶所食葉木

說文榑桑神木

說文繫傳桑東方自然之神木

賈子胎教篇桑者中央之木也

典術桑爲神木

典術桑木虛星之精

高誘呂氏春秋注榑木榑桑

尚書考靈曜桑木箕星之精蟲食葉爲文章人食之老

翁爲小童

春秋考異郵桑土液木生火故蠶三月食葉

元中記天下之高者扶桑無枝馬上至天盤蜿而下屈
通三泉也

搜神記大古之時有人遠征家無餘人惟有一女牡馬
一匹女親養之窮居幽處思念其父乃戲馬曰爾能
爲我迎得父還吾將嫁汝馬旣承此言乃絕韁而去
徑至父所父見馬驚喜因取而乘之馬望所自來悲
鳴不已父曰此馬無事如此我家得無有故乎亟乘
以歸爲畜生有非常之情故厚加芻養馬不肯食每
見女出入輒喜怒奮擊如此非一父怪之密以問女

女具以告父必爲是故父曰勿言恐辱家門且莫出入于是伏弩射殺之暴皮于庭父行女與鄰女于皮所戲以足蹙之曰汝是畜生而欲取人爲婦耶招此屠剝如何自苦言未及竟馬皮蹙然而起卷女以行鄰女忙怕不敢救之走告其父父還求索已出失之後經數日得于大樹枝間女及皮盡化爲蠶而績于樹上鄰婦取而養之其收數倍因名其樹曰桑桑者喪也由斯百姓競種之今世所養是也

路史伏戲氏教民蠶桑爲總布

孝經援神契神農耕桑得利究年受福

路史神農教之桑麻

拾遺記少昊母曰皇娥經歷窮桑滄茫之浦時有神童
稱爲白帝之子與皇娥游漾忘歸窮桑者西海之濱
有孤桑之樹直上千尋葉紅椹紫萬歲一實及皇娥
生少昊號曰窮桑氏亦曰桑邱氏

獨斷少皞桑扈氏農正趣民養蠶

三墳地皇軒轅氏政典布帛桑麻必有用

路史黃帝有熊氏夫人副禕而躬桑

尸子有虞氏妻有桑田

列女傳后稷簡狄教之時藝桑麻

吳越春秋后稷爲兒時好樹桑

新語后稷分土地之宜種桑致絲以敝形體

桑志卷第一

桑志卷第二

海鹽李聿求五峯甫簣

桑之類

種類不一以荆魯二種爲上外有異名異類亦
間附之志桑之類第二

詩豳風猗彼女桑傳女桑葢桑也箋女桑少枝長條不
落不枝者東而采之

詩大雅其縻其柘傳縻山桑也

爾雅桑辨有甚梔疏桑樹一半有甚一半無甚爲梔
爾雅女桑榑桑縻桑山桑

爾雅桑柳醜條

齊書扶桑國在大漢國東二萬餘里土多扶桑葉似桐
初生如筍國人食之實如梨而赤

唐書南蠻傳野桑生石上其林上屈兩向而下植取以
爲弓不筋漆而利名曰暝弓

管子擾桑注擾桑又曰柔桑也

拾遺記員嶠山有木名猗桑者煎葑以爲蜜
拾遺記扶桑萬歲一枯其人視之如旦暮也
括地圖芒尙山其桑長千仞

異苑北方有白桑葢長數寸食之甘美

述異記空桑生大野中爲琴瑟之最者空桑也

嶺表錄異記佛桑似朱槿花莖葉如桑故名佛桑三月
花至冬至

齊民要術今世有荆桑地桑之名

齊民要術種取黑魯椹黃魯椹不耐久諺曰魯桑百豐
絲帛言其桑好功用省力

郭橐駝種樹書雞腳桑葉花而薄

郭橐駝種樹書白桑葉大如掌而厚

郭橐駝種樹書先甚而後葉者葉必少

顏師古漢書注廩山桑有點文者

杜陽雜編彌羅國有桑覆地而生大者十數頃小者蔭百畝

陳旉農書海桑低亞

農桑要旨平原淤壤土肥地虛荆桑魯桑種之俱可若地連山陵土脈赤硬止宜荆桑

農桑通訣桑種甚多不可徧舉世所名者荆與魯也荆桑多甚魯桑少甚葉薄而尖其邊有瓣者荆桑也凡枝幹條葉堅勁者皆荆桑類也葉圓厚而多津者魯桑也凡枝幹條葉豐腴者皆魯桑類也荆之類根固而心實能久遠宜爲樹魯之類根不固心不實不能

久遠宜爲地桑然荆之條葉不如魯葉之茂盛當以魯葉條接之則能久遠而又盛茂也魯爲地桑而有壓條之法傳轉無窮是亦可以久遠也

蠶經有地桑出于南潯有條桑出于杭之臨平

蠶經凡擇桑之本也皺皮者其葉必小而薄白皮而節疎芽大者爲柿葉之桑其葉必大而厚是堅繭而多絲

蠶經高而白者宜山岡之地或牆隅而籬畔

蠶經短而青者宜水鄉之地

蠶經青桑無子葉不甚厚

蠶經望海之桑種之術與白桑同

蠶經紫藤之桑其種高大

格物總論桑大者數圍高一二丈許皮粗枝幹條竦正
二月抽條發葉葉大者盈尺有刻缺面深綠而光

博聞錄白桑少子壓枝種之若有子可便種須地陰處
其葉厚大

農政全書鍾化民曰桑有二種一種有桑甚卽以桑甚
植地一二月卽出一種將桑樹柔條攀至于地以泥
壓於上每一桑眼卽發一枝待至二三尺長其桑有
根用剪剪下移種于地上卽成桑樹

本草白桑葉大如掌而厚雞桑葉細而薄子桑先甚而後葉山桑葉尖而長

本草桑生黃衣謂之金桑其木將槁

事物紺珠雲桑密縣山野生樹枝葉皆類桑但葉如雲頭花木樂細青黃色

烏青文獻桑類有密眼青白皮桑荷葉桑雞腳桑扯皮桑失葉桑晚青桑火桑山桑紅頭桑槐頭青雞桑木竹青烏桑紫藤桑望海桑

沈氏農書桑以荷葉桑黃頭桑木竹青爲上五頭桑大葉密眼青次之細葉密眼青爲最下

倦圃蒔植記白桑有花無實黑桑有實無花

桑志卷第二

桑志卷第三

海鹽李聿求五峯甫纂

桑之事

耕桑樹藝古聖因以利民勸農課桑史冊垂其
令典三代以來皆惟桑是貴誠以衣服之大源
閭閻之至計也志桑之事第三

漢書文帝紀十三年正月詔曰皇后親桑以奉祭服
漢書景帝紀元年春正月詔曰郡國或磽陁無所農桑
數畜其議民欲徙寬大地者聽之

漢書景帝紀後元二年夏四月詔曰朕親耕后親桑以

奉宗廟桑盛祭服爲天下先

漢書景帝紀後元三年春正月詔曰令郡國務勸農桑
益種樹可得衣服食物

漢書昭帝紀元平元年春二月詔曰天下以農桑爲本
日者省用罷不急官減外繇耕桑益衆而百姓未能
家給朕甚愍也

漢書元帝紀建昭五年春三月詔曰方春農桑興百姓
戮力自盡之時也

漢書成帝紀陽朔四年正月詔曰令二千石勉勸農桑
出入阡陌致勞來之

後漢書明帝紀詔曰方春戒節人耕桑有司務順時氣使無煩擾

後漢書明帝紀永平三年詔曰春者歲之始也始得其正則三時有成有司其勉順時氣勸督農桑

後漢書明帝紀永平十年詔曰百姓勉務桑稼以備災害

後漢書章帝紀建初元年正月詔曰方春東作宜及時務二千石勉勸農桑宏致勞來

三國志孫權傳赤烏三年詔曰督軍郡守當農桑時以役事擾民者舉正以聞

三國志孫休傳永安二年詔曰今欲廣開田業輕其賦稅諸卿尚書可共咨度務取便佳田桑已至不可後時事定施行稱朕意焉

晉書元帝紀大興元年秋七月詔曰二千石令長當祇奉憲勸課農桑

宋書文帝紀元嘉八年詔曰自頃農桑惰業遊食者衆郡守賦政方畿縣宰親民之主宜思獎訓導以良規咸使肆力地無遺利耕蠶樹藝各盡其力若有力田殊衆歲竟條名列上

宋書文帝紀元嘉二十年詔曰耕桑未廣地利多遺有

司班宣舊條務盡敦課遊食之徒咸令附業

宋書文帝紀二十一年詔曰凡諸州郡皆令盡勤地利
勸導播殖蠶桑麻枲各盡其方不得但奉行公文而
已

宋書武帝大明三年詔曰古者薦鞠青壇聿祈多慶分
繭元郊以供純服來歲可使六宮妃嬪修親桑之禮
齊書武帝紀永明三年詔曰守宰親民之要刺史案部
所先宜嚴課農桑相土揆時必窮地利

齊書明帝紀建武二年詔曰守宰親民之主牧伯調俗
之司宜嚴課農桑罔令游惰

陳書文帝紀天嘉元年詔曰守宰明加勸課務急農桑
魏書世祖紀太平眞君四年詔曰牧守之徒勸課農桑
魏書高祖紀太和元年詔曰農夫外布桑婦內勤民有
惰于農桑者加罪刑

魏書世宗紀景明三年詔曰比京邑初基耕桑暫缺遺
規往旨宜必祗修

冊府元龜唐元宗開元十七年詔曰方就農桑其力役
及不急之務一切並停

冊府元龜唐肅宗上元二年詔天下刺史縣令各于所
部親勸農桑

冊府元龜唐德宗貞元二十年詔曰宜勉務農桑各安生業

舊唐書憲宗紀元和三年四月敕天下州府民戶每田一畝種桑二樹

舊唐書武宗紀會昌二年敕勸課種桑

冊府元龜後周太祖廣順元年敕諸道州府長史宜勸課耕桑以豐儲積

冊府元龜後周太祖廣順二年敕諸道府州吏勸課鄉縣百姓栽接桑棗

玉海宋太祖乾德四年閏八月詔百姓能廣植桑開荒

田者只納舊租

宋史孝宗紀淳熙八年詔監司守令勸課農桑

宋史理宗紀寶慶三年詔郡縣長吏勸農桑

宋史理宗紀端平三年詔勸農桑

遼史太宗紀會同元年詔有司勸農桑

遼史道宗紀清寧二年詔遣使分道勸農桑

元史世祖紀統二年詔宣撫司官勸農桑

元史世祖紀至元六年命中書省采農桑事列爲條目

仍令按司與州縣官相風土之所宜講究可否別頒行之

元史世祖紀至元二十三年詔以農桑輯要書頒諸
元史世祖至元二十五年詔諭廉訪司巡行勸課農桑
元史成宗紀元貞元年詔以農桑水利諭中外
元史武宗紀至大三年詔諭大司農勸課農桑
元史仁宗紀皇慶元年諭司農曰農桑衣食之本汝等
舉諳知農事者用之

元史仁宗紀皇慶二年敕守令勸課農桑

元史仁宗紀延祐二年詔印農桑輯要萬部頒降有司
元史順帝紀至正元年詔守令選立社長勸課農桑
續文獻通考太祖洪武五年敕考課必書農桑之績

明史太祖紀洪武八年詔曰農桑衣食之本朕嘗設置有司頒行條章何有司不遵朕命往往給由赴京者皆無桑株數目甚與朕意相違特敕中書令有司今後敢有無農桑者論擬違制

明史成祖紀永樂二年諭曰今春和時東作方興宜各勸課農桑

禮祭義古者天子諸侯必有公桑蠶室近川而爲之築宮仞有三尺棘牆而外閉之及大昕之朝君皮弁素積卜三宮之夫人世婦之吉者使入蠶于蠶室奉種浴于川桑于公桑風戾以食之

禮月令季春之月后妃齋戒親東鄉躬桑

漢書元后傳孝元皇后爲太后幸璽館率皇后及列侯夫人桑

衛宏漢舊儀春桑生而皇后親桑于苑中羣臣妾從桑還獻于繭觀皆賜從桑者樂皇后自行

丁字漢儀皇后出乘鸞輅青羽蓋駕駟馬龍旂九旒大將軍妻參乘太僕妻御前鸞旂車皮軒闔戟雒陽令奉引亦千乘萬騎車府令設鹵簿駕公卿五營校尉司隸校尉河南尹妻皆乘其官車帶夫本官綬從其官屬導從皇后置虎賁羽林騎戎頭黃門鼓吹五帝

車女騎夾轂執法御史在前後亦有金鉦黃鉞五將導桑于蠶宮

董巴輿服志漢皇后桑于東郊苑中

晉書禮志皇后著十二笄步搖依漢魏故事衣青衣乘油蓋雲母車駕六驄馬女尚書著貂蟬佩璽陪乘載筐鉤公主三夫人九嬪世婦諸太妃太夫人及縣鄉君郡公侯特進夫人外世婦命婦皆步搖衣青各載筐鉤從先桑二日蠶宮生蠶著簿上蠶桑日皇后未到太祝令質明以太牢告祠皇后至西郊升壇公主以下陪列壇東皇后東面躬桑采三條諸妃公主各

采五條鄉縣君以下各采九條悉以桑授蠶母還蠶室事訖皇后還便座公主以下乃就位設饗宴賜絹各有差

宋書禮志大明四年皇后率六宮躬桑于西郊

北齊書皇后親桑于壇備法駕服鞠衣乘重翟帥六宮升桑壇東陞卽御座女尚書執筐女主衣執鉤立壇下皇后自東陞執筐者處右執鉤者處左乃躬桑三條訖升壇卽御座內命婦以次就桑服鞠衣者采五條展衣綠衣者九條以授蠶母還蠶室切之授世婦灑二簿凡應蠶者並復本位后乃降壇還便殿設勞

酒頒賚而還

後周書皇后乘翠輅率六宮三妃三妣御媛御婉三公夫人三孤內子至蠶所禮畢降壇令二嬪爲亞獻終獻因以躬桑

隋書季春上巳皇后服鞠衣親桑于位壇東南尚功進金鉤典奉筐皇后采三條反鉤命婦各依班采五條九條世婦以授蠶母受切桑灑訖皇后降壇

大唐開元禮爲采桑壇于壇南二十步所方三丈高五尺西出陛尚舍量施帷幃于外壝之外四面開門其東門使容厭翟車又設御采桑位于采桑壇下東設

內命婦采桑位于壇下當御位東北每等異位南向
西上設外命婦采桑位于壇下當御位東南每等異
位北向西上設執御鉤筐者位于內命婦之西少南
西上尚功執鉤
司制執筐設內命婦執鉤筐者位各于其采桑
位之者尚功下四與執鉤
司制下女史執筐

大唐開元禮前享一日金吾奏請外命婦等應集壇所
者竝聽行夜其應采桑者四人各具女侍者進筐鉤載
之而行監門先奏請享日未明四刻開所由苑門諸
親及命婦以下以次入詣壇南次所各服其服其應
采桑者筐鉤各具女侍者執授內謁者監內謁者監

受之以授執筐鉤者享日未明三刻搥一鼓爲一嚴

三嚴時節前日內侍奏裁

未明二刻搥二鼓爲再嚴尙儀板奏請

申嚴內命婦各服其服所司陳車駕鹵簿未明一刻

搥三鼓爲三嚴司賓引內命婦入立于庭重行西面

以北爲上六尙以下各服其服俱詣室奉迎

尙服負寶如式

內僕進厭翟車于閤外尙儀板奏外辦馭者執轡皇

后服鞠衣乘輿以出華蓋侍衛警蹕如常內命婦從

出門皇后升車尙功司制進筐鉤載之仗衛如常內

命婦及六尙等乘車陪從如式其內命婦應采桑者

四人各服典製等進筐鉤載之諸翊駕之官皆乘馬

駕動警蹕如常不鳴鼓吹諸衛前後督攝如常內命婦宮人以次從

大唐開元禮享日未明二刻諸享各服其服尙儀及司醞各帥其屬駕將至內引引命婦俱就門外位駕至大次門外迴車南向尙儀進車前跪奏稱尙儀妾姓名請降車興還侍位皇后降車乘輿至大次華蓋繼扇侍衛如常儀皇后降車訖尙功司製進受鉤筐以退

其內命婦鉤筐則內命婦降車訖典製等進乃受之

禮畢請就采桑位尙宮

引皇后樂作詣采桑壇升自西陛東向立

大唐開元禮皇后將詣望瘞位司賓引內外命婦采桑

者俱就采桑位

內外命婦一品各二人二品三品各一人

諸執筐鉤者各

就位皇后既至采桑位尙功奉金鉤自北陸升壇進典製奉筐受桑皇后采桑三條止尙功前受鉤典製以筐俱退復位皇后初采桑典製等各以鉤授內外命婦皇后采桑訖內外命婦以次采桑女史執筐者受之內外命婦一品各采五條二品三品各采九條止典製等受鉤與執筐者退復位司賓引婕妤一人詣蠶室尙功帥執鉤筐者以次從至蠶室尙功以桑授蠶母蠶母受桑切之以授婕妤好食蠶灑一簞訖司賓引婕妤還本位尙儀前奏禮畢退復位尙功引皇

后還大次樂作入大次訖樂正司賓引內命婦內典引引外命婦各還其次尙儀典正以下俱復執事位立定司贊曰再拜尙儀以下皆再拜訖出女工人以次出其祝板燔于齋所

宋史眞宗景德三年築先蠶壇于東郊從桑生之義

宋史徽宗政和元年四月詔就先蠶壇之側度地築公桑蠶室

文獻通考議禮局被旨議倣後齊制置公桑蠶室度地爲宮四面爲牆高仞有三尺上被棘築采桑壇于先蠶壇南相距二十步方三丈高五尺四出陛

明史設皇后采桑位于采桑壇東向公主及內命婦位于皇后位東外命婦位于采桑壇東陛下南北向以西爲上設執皇后鉤筐者位于皇后位傍少東司賓引外命婦先詣采桑壇位南北向尙儀奏請皇后詣采桑位公主以下各就位執鉤者跪進鉤執筐者跪奉筐受桑皇后采桑三條還至壇南儀門坐觀命婦采桑三公命婦采桑五條列侯九卿命婦采桑九條訖各授女侍司賓引內命婦一人詣蠶室尙功帥執鉤筐者從尙功以桑授蠶母蠶母受桑縷切之以授內命婦內命婦食蠶灑一箔訖還

夏小正三月攝桑戴德傳桑攝而記之急桑也

周禮地官載師凡宅不毛者有里布鄭衆注宅不毛者謂不樹桑麻也賈公彥疏民有五畝之宅廬舍之外不樹桑麻之毛者罰以二十五家稅布謂口率出泉漢法口百二十也

禮月令季春之月命野虞無伐桑柘

禮月令孟夏之月以桑爲均貴賤長幼如一以給郊廟之服孔穎達正義收稅之時以受桑多少爲均齊桑多則賦多桑少則賦少貴賤長幼如一貴謂公卿大夫之妻賤謂士之妻長幼謂婦老幼無問貴賤老幼

出之時齊同如一以近郊之稅十而稅一也

孟子五畝之宅樹之以桑

孟子五畝之宅樹牆下以桑

管子桑麻不植于野國之貧也桑麻植于野國之富也
相高下視肥瘠觀地宜明詔期前後農夫以時均脩
焉使桑麻皆安其處田田之事也朱長春曰田田畯
之類

亢倉子后妃率嬪桑公田勸人力婦教也

韓詩外傳召伯就蒸庶于阡陌隴畝之間而聽斷百姓
大悅耕桑陪力以勸

淮南子原蠶一歲再登非不利也然王者法禁之爲其殘桑也

淮南子召公以桑蠶之時弛獄出拘使百姓皆得反業修職

韓子子產開畝種桑鄭人誦訾

穆天子傳居范宮以觀桑者乃飲于桑中命桑虞出桑者用禁暴民

春秋繁露秉耒躬耕采桑親蠶以足衣食所以奉地本也

法言或問何思曰男子耕婦人桑謂之思

申鑒帝耕籍田后桑蠶宮國無遊人野無荒業

申鑒興農桑以養其性審好惡以正其俗

吳越春秋一女不桑則受其寒

白虎通義王者親耕后親桑所以率天下農蠶也

潛夫論一婦桑百人衣之

潛夫論民廢農桑遠來詣闕而拘以禁忌豈爲政之意乎

昌言益君長以興政理急農桑以豐委積

昌言君子非自農桑以求衣食也

昌言農桑失業兆民吁嗟

新論天子親耕后妃躬桑國非無良農也而王者親耕
世非無蠶妾也而后妃躬桑上可以供宗廟下可以
勸兆民

漢書平帝紀元始四年置大司農部丞十三人人部一
州勸農桑

漢書食貨志晁錯說上曰夫寒之于衣不待絪煖飢之
于食不待甘旨飢寒至身不顧廉恥人情一日不再
食則飢終歲不制衣則寒夫腹餒不得食膚寒不得
衣雖慈母不能保其子君安能以其民哉明主知
其然也故務民于農桑

漢書食貨志還廬樹桑

漢書藝文志農家者流蓋出于農稷之官播百穀勸耕桑以足衣食

漢書谷永爲北地太守上使衛尉淳于長受永所欲言永對曰二千石敕勸耕桑毋奪民事

漢書黃霸爲潁州太守務耕桑種樹畜養霸精力能推之

漢書龔遂爲渤海太守見齊俗奢侈好末技不田作廼躬率以儉約勸民務農桑郡中皆有畜積吏民皆富實

漢書地理志召信臣爲南陽太守勸民農桑

後漢書禮儀志侍御史持節慰勞以詔恩問所疾苦勸以農桑

後漢書百官志凡郡國以春行所主縣勸農桑

後漢書卓茂遷密令是時王莽秉政置大司農六部丞勸農桑遷茂爲京部丞

後漢書茨充爲桂陽教民種植桑柘

後漢書張堪拜漁陽太守勸民耕種百姓歌曰桑無附枝麥秀兩歧張君爲政樂不可支

後漢書仇覽爲蒲亭長農事旣畢乃命子弟羣居就學

其剽輕遊恣者皆役以農桑

後漢書馮魴拜虞令以威信稱遷邾令盜賊羣起魴行軍法皆叩首曰今日受誅死無所恨魴曰汝知悔過各反農桑

東觀漢記建初八年王景爲廬江太守教民種桑

魏志鄭渾遷邵陵令民皆剽輕不念產植渾奪其漁獵之具課使農桑

齊民要術杜畿爲河東勸農桑

齊民要術顏裴爲京兆令阡陌樹桑

晉書食貨志武帝太始八年司徒石苞奏州郡農桑未

有殿最之制宜增掾屬令吏有所循行帝從之

晉書食貨志元帝大興元年將軍應詹表曰不親農桑而遊食者以十萬計不思開立美利而望國足人給豈不難哉

晉書桓宣鎮襄陽勸課農桑

晉書溫嶠上疏曰司徒置田曹掾州一人勸課農桑察吏能否今宜依舊增之

晉書王宏爲汲郡太守撫百姓如家耕桑樹藝屋宇阡陌莫不躬親自教示

晉書王孚以關中遭賊寇穀帛不足遣冀州農丁五千

屯于上邽秋冬習戰陣春夏修桑田

晉書馮跋載記跋勵意農桑勤心政事下書曰桑之益
有生之本此土少桑人未知其利可令百姓人植桑
一百根柘二十根

宋書周朗疏曰農桑者實民之命若重之宜寵金錢
梁書沈瑀爲建德令教人一丁種十五株桑女丁半之
人咸歡悅頃之成林

魏書食貨志男夫一人給田二十畝課蒔餘種桑五十
株多種桑者不禁

魏書李安世上疏曰廬井荒涼桑榆改植良疇委而不

開柔桑枯而不采欲令家豐歲儲其可得乎愚謂雖桑井難復宜更均量

魏書辛纂拜河南刺史督勸農桑

魏書蘇綽曰三農之隙陰雨之暇當教人種桑

北史崔衡除秦州刺史修龔遂之法勸課農桑

通典北齊每丁給永業二十畝爲桑田其田中種桑五十株

隋書食貨志北齊河清三年定令每歲春月各依鄉土早晚課人農桑蠶桑之月婦女十五以上皆營蠶桑
隋書北齊正月班詔勸率農桑

隋書食貨志丁男一牀租粟三石桑土調以絹繩

通典隋文帝遵北齊之制並課樹桑

唐書百官志凡十道巡按以判二人爲佐務煩則有支使其三察農桑不勤

唐書百官志寺人掌宮人簿帳女工凡宮人名籍司其除附公桑養蠶會其課業

通典唐開元二十五年令每畝種桑五十根以上三年種畢

文獻通考唐武德七年始定均田賦稅以二十畝爲永業樹以桑

唐書蕭定劭桑稼

五代史唐明宗長興四年帝幸龍門七里亭見剗桑稼樹枉駕勞問親自勸課

五代史張全義爲河南尹招懷流散勸之樹藝數年之後桑麻蔚然

宋史食貨志民造溫桑僞茶比犯眞茶計直十分論二分之罪

宋史太祖紀禁伐桑

文獻通考宋建隆二年課民種樹每縣定民籍爲五等第一等種雜樹百每等減二十爲差桑半之太平興

國二年又禁伐桑爲薪

文獻通考宋太平興國二年江南西路轉運使上言諸州蠶桑素少而金價頗低

文獻通考宋至道二年靖時爲直史館上言曰其室廬及桑棗之地十丁者給百五十畝七丁者百畝五丁七十畝三丁五十畝二丁三十畝除桑功五年後計其租

文獻通考宋熙寧六年司農寺請立勸民種桑法天下民種桑柘毋得增賦先時河東等戶以桑之多寡爲高下故植桑者少至和中詔罷之時又立法勸民栽

桑有不趨令則做屋粟里布爲之罰民以爲病旣而
詔罷

文獻通考宋崇寧四年尙書言毀伐桑柘者杖以曉衆
從之

宋史食貨志諭民能廣植桑墾開荒田者止輸舊租

宋史食貨志中書議勸民栽桑

宋史食貨志都省言淮民復業宜先勸課農桑令丞植
桑三萬株至六萬守倅部內二萬株以上並論賞有
差

宋史河北東路民富蠶桑契丹謂之綾絹州

宋名臣言行錄張詠令崇陽拔茶而植桑

東都事略范純仁知襄陽縣課民種桑民號其桑爲著作林

金史大定五年伐桑爲薪命大興少尹完顏讓巡察

金史食貨志凡桑民戶以多植爲勤少者必植其地十之三

金史食貨志泰和元年每田四十畝樹桑一畝毀樹木者有禁

元史食貨志至元二十八年頒農桑雜令

元史司農進撰栽桑圖說帝曰農桑衣食之本此圖甚

善

元史食貨志中統元年頒農桑輯要之書于民

元史中統二年命中書省宣慰司諸路達魯花赤管民
勸種植桑

元史至元七年司農司專掌農桑種植之制每丁課種
桑二十本

元史至元二十三年大司農上諸路儲義糧九萬五百
三十五石植桑棗雜果三千三百九萬四千六百七
十二株

元史食貨志延祐三年以苗好謙所至植桑皆有成效

于是風示諸道以爲式是年十一月命各社出共蒔桑苗以社長領之四年又以社桑不便令民各畦種之

元史致和元年頒農桑舊制十四條

續文獻通考元至大二年苗好謙獻種蒔之法其說分農民爲三等上戶地一十畝中戶地五畝下戶地二畝或一畝皆築牆圍之以時收采桑椹依法種植元主善而行之

元史李德輝爲太原守勸農桑

元史姜彧知濱州課民種桑歲餘新桑遍野人名爲太

守桑

桑志卷第三